

Lous luqués

A Mgne l'Archebesque d'Albi
en soubengue d'uo bouno serado.

Bèt tems i a, lous nostes se diuènon assembla-s enta Nadau. Lou papa aueuo gahat uo lèbe au jas : en hasoun un boun cibét. E la mama pleèc uo terrio de lèit enta, dambe oéus, hè la crèmo. Jou n'aueni pas hèit arré, mes forço passis, e lous oélhs que se-m barrauon de drome. Eri setut sou bancot dou cournè, e, pausats per terro lous dus plats atendèuon lou moumént dou ressoupét.

*
* *

M'auējani tout soulét. Tout d'un cop, besi à entra dens la cousino un ome biélh, que s'aprouchèc de jou e me digouc :

« Adiu, petit ! em reconnegues ? »

Jou l'espiaui e me semblauo plan l'aue bist en cauque loc : aquero barbo griso, aquet cap sense trop de péus, las claus que tengueuo à la man me haseuon pensa en aquet sent Pierro abilhat de pelhos coulou de pruos, que demoro tout qui-lhat costo lou pila de la nosto glèiso. Mes aqueste èro mage e n'èro pas ta joén.

Taplan lou digoui : « Bonsoèr Moussu... »

— Amen ! me respounoc. Que soui Sent Pierro, lou patroun de la parroquio, lou qui ei à la porto

dou cèu. Passi per aci en tourna dou haure dou Peloun. M'arranjèc, l'an passat, las claus dou purgatori, e adaro qu'ei las dou cèu que m'an desbauchados: serbichen ta pau ! En passa èi sentit lou herum dou cibet, e soui entrat... maniero ! Aro m'en tourni per nosto e se-m bos accompagna drin de camin te herèi bese berajos causos.

— S'aueui lou téms auant que ne soupon, at boi plan ! digoui.

— Tio, tio ! en dus sauts que seras tournat, se-m respounouc.

* * *

Partiscoui tout content dam bét. Haseuo escu, mès sent Pierro aueuo sou darrè dou cap en modo de chapèn, un arroudét de luts qu'esclairaou la routo d'oun boutaon lous pas.

Arribèn prou lèn dauant uo porto barrado. Se tirèc de la potcho no clau, Sent Pierro, e chiulèc. La porto s'aubriscouc e entrèm dens un coulidor loug, loug, dambe tres portos.

« Aci qu'èn arribats ! se me digonc. Beses aqueros portos ? que n'èi las claus. La prumèro, ei la porto de la bito ; la segoundo, la porto dou purgatori ; la darrèro, la porto dou cèu ; e, an houns, l'infèr, mes d'aquiu m'occupi pas ; i ban tout souls. Enta bese lou cèu, s'ès bien brabe, t'i herèi entra un jour quand sios passat pou purgatori. Mes sabes que-t calera decha tous lous paquets

e boucha-te lous pès avant d'entra; astromènt, que demoureres tout jours à la porto. Toutaco, at beiras mes tard, adaro te bau hè bese la cram-po de la bito. »

* * *

Se prengouc uo petito clau lusento, daubris-cout la prumèro porto e me hasouc entra. Besoui jou talèu uo gran cram-po grano, grano, touto plèo de petitos lampos alugados e pausados en terro. Las uos que hardèuon bien, d'autos pres-que amourtidos; e un bailet s'amassauo las mortos dens un pairèt e s'ac empourtauo.

« Beses aqueros lutz? ça dits sent Pierro. Caduo que represento la bito de cadun de lous que soun ser terro. Mes que harden, mes que i a oli dens la lampo, mes qu'i a bito per éts; mens i a oli, mes biste mouriran, lous praubots, ser terro. »

E jou besoui las lutz de touts...

« Moun Diu! sent Pierro, i ei la mio, aqui? demandèi.

— Tio, dessigu; oèro-lo! Aquet petit luquét que trembloto proche de la finèstro daubrèito. »

M'aprouchèi tout douçoment de la mio lutz, e bau bese que l'oli ero batlèu tout hounut per la mèco. Moun Diu de jou! bau mouri lèu! pensai tout estoumagat.

« Diset-me, sent Pierro, e la dou Jan dou

Beulaigo, e la dou Natolo dou Dourmaire, i soun tabé ?

— Oèro-los darrè la tuo, respounouc sent Pierro », en tout se proumena au trauès de las luts.

En memo téms s'estanguèc au proche de la finèstro enta bese lou téms que cambiauo.

« Ba plaue ! se-m digouc. Ba cale barra la finèstro ; lou bent m'amourtiré cauque praube luquét. »

Jou l'espiaui sense dise arré. Mes astalèu que birèc la reo enta barra las bitros, m'aclepè, gahi no luts qu'èro pleo au ras, e biste tourneji l'òli dens la mio. Astalèu la prauboto s'arrebiscoulèc e esclairèc...

* * *

Mes tabé un couhat capbat las aurelhos m'assetouc per terro ! Besoui milo candelous e, au meiloc, la mama, bouganto de coulèro cridauo :

« Foutut drolle ! te bau hè bese, jou, de mous birouleja la crèmo dens lou cibét ! Rabassejo, se bos ; mes te bau esbelha jou ! attendo ! »

N'attendoui pas !... Mes, desempuch, lou dimenche, quand besi sent Pierro costo au pila, me pari las aurelhos.

LOU CÉSET.

Mirande (Gers).